

仁

獄

類

編

仁獄類編卷之十一

新安余懋學行之父墓

弟懋游叔常父閔

甥韓起龍校梓

斷議 凡六十三則

夫謀取稽衆言貴繹同自昔制刑之主曷嘗徇  
一夫之謀議而不集衆人之聞見哉徃牒所載  
或奉廷議或據已見言人人殊要以集衆思定  
國是剛克柔克惟其宜勿辟勿宥惟其中式爾

適爾惟其慎。上服下服惟其適。雖言有從違。見  
有可否。其于以劑陳臬之宜。而裨敬威之益。則  
一也。夫議以集衆人之同。斷以酌一己之獨議。  
而斷不爲桀舍。斷而議不爲窺牖。議故合。執兩  
之權。斷故協。用中之義。慎斯二者。以往。則斯無  
咎矣。爰彙斷議。

季彥論繼母

梁人娶後妻。後妻殺夫。其子又殺之。孔季彥返魯。  
過梁。梁相曰。此子當以大逆論禮。繼母如母。是殺

母也。季彥曰：言如母，則與親母不等。欲以義督之也。昔文姜與殺魯桓，春秋去其姜氏。傳曰：不稱姜氏，絕不爲親禮也。絕不爲親，卽凡人爾。且夫手殺重於知情，知情猶不得爲親，則此下手之時，母名絕矣。方之古義，是子宜以非司寇而擅殺當之，不得爲殺母而論以大逆也。梁相乃從之。

### 漢武議子罪

漢景帝時，廷尉上囚內有防年，繼母陳殺防年父。防年因殺陳，吏因律以殺母大逆論。帝疑之，武帝

時年十二。爲太子在帝側。遂問之。對曰。妾繼母如母。明不及母。緣父之故。比之於母。今繼母無狀。手殺其父。下手之日。母恩絕矣。宜與殺人同。不宜以大逾論。

### 延年持議平

漢杜延年爲大僕。右曹給事中。初治燕王獄時。御史大夫桑弘羊子遷亡。過父故吏侯史吳。後遷捕得伏法。會赦。侯史吳自出繫獄。廷尉王平與少府徐仁雜治反事。皆以爲桑遷坐父反事。而侯史吳

藏之。非匿反者。乃匿爲隨者也。卽以赦令除史吳罪。後侍御更治實。以桑遷明經術。知父謀反而不諫爭。與反者身無異。侯史吳故三百石吏。首匿遷。不與庶人匿。隨從者等。吳不得赦。奏請覆治。劾廷尉少府縱反坐。少府徐仁。卽丞相車千秋女婿也。故千秋數爲侯史吳言。恐光不聽。千秋卽召中二千石博士。會公車門。議問吳法。議者知大將軍指。皆執吳爲不道。明日。千秋封上衆議。光於是以千秋擅召中二千石以下。外內異言。遂下廷尉平少

府仁獄朝廷皆恐丞相坐之。延年乃奏記光。爭以爲吏縱罪人有常法。今更詆吳爲不道。恐於深文。丞相素無所守持。而爲好言于下。蓋其素行也。至擅召中二千石。甚無狀。延年愚以爲丞相久故。及先帝用事。非有大故。不可棄也。間者民頗言獄深。吏爲峻詆。今丞相所議。又獄事也。如是。以及丞相恐不合衆心。羣下謹譁。流言四布。延年竊重爲將軍失此名於天下也。光以廷尉少府。弄法輕重。皆論棄市。而不以爲丞相。延年論議持平。合和朝廷。

皆此類也。按侯史吳非匿反者。乃匿爲隨者。平仁等以赦令除之者。當後侍御之更治。無亦承光指而深入之乎。延年所議。能免丞相之無及。而不救平仁之不坐。蓋光意已定。勢有不可反也。

### 廷臣議不道

漢朱博爲丞相時。傳太后怨其從弟高武侯喜。曩持正議。不與稱尊號。孔鄉侯晏風博。令奏免喜侯。博受詔。與御史大夫趙玄議。玄言事已前決。得無不宜。博曰。已許孔鄉侯。有指匹夫相要。尚相得死。



何況至尊博惟有死耳。玄卽許可。博惡獨斥奏喜。以故大司空紀鄉侯何武前亦坐過免就國。事與喜相似。卽并奏喜武請皆免爲庶人。上知傅太后素常怨喜。疑博玄承指。卽召玄詣尚書問狀。玄辭服。有詔左將軍彭宣與中朝者雜問。宣等劾奏博宰相玄上卿晏以外親封位特進股肱大臣。上所信任。不思竭誠奉公務。廣恩化爲百寮先。皆知喜武前已蒙恩詔決事。更三赦博執左道。虧損上恩。以結信貴戚。背君鄉臣。傾亂政治。姦人之雄。附下。

罔上爲臣不忠不道。玄知博所言非法，枉義附從。大不敬。晏與博議免。喜失禮不敬。臣請詔謁者召博、玄、晏詣廷尉，詔獄制曰：將軍中二千石、二千石諸大夫、博士、議郎、議右將軍、驕望等四十四人，以爲春爲如宣等言可許。諫大夫龔勝等十四人，以爲春秋之義，姦以事君，常刑不赦。魯大夫叔孫僑如欲顓公室，譖其族兄季孫行父于晉，晉執囚行父，以亂魯國。春秋重而書之。今晏方命圯族，干亂朝政，要大臣以罔上，本造計謀，職爲亂階，宜與博、玄同。

罪罪皆不道上減玄死罪三等削晏戶四分之一  
假謁者節召丞相詣廷尉詔獄博自殺按是獄晏當與博同  
罪所可差減者獨玄耳今博死而晏削得非猶以太后故乎頗刑甚矣

### 孔光議緣坐

漢孔光遷廷尉時定陵侯淳于長坐大逆誅長小妻廼始等皆以長事未發覺時棄去或更嫁及長事發丞相翟方進大司空何武議以爲今犯法者各以法時律令論之明有所訖也長犯大逆時廼始等見爲長妻已有當坐之罪與身犯法無異後

當棄去。於法無以解。當論。光論以爲大逆無道。父  
母妻子同產。無少長皆棄市。欲懲犯法者也。夫婦  
之道。有義則合。無義則離。長未知當坐大逆。而棄  
去。廼始等。或更嫁。於義已絕。而欲以爲長妻。名不  
正。不當坐。有詔。光議是。

### 丞尉議創戮

漢薛宣爲丞相。後母死。弟修持服三年。宣不爲持  
服。博士申咸素毀宣。薄於骨肉。前以不忠孝。免不  
宜。復列封侯。在朝省。宣子况爲右曹侍郎。數聞其

語。賊客揚明。欲令創咸面目。使不居位。會司隸缺。况恐咸爲之。遂令明遮斫咸宮門外。斷鼻唇。身八創。事下有司。御史中丞衆等奏。况朝臣父故宰相。再封列侯。不相勅承化。而骨肉相疑。疑咸受修言。以謗毀宣。咸所言。皆宣行迹。衆人所共見。公家所宜聞。况知咸給事中。恐爲司隸舉奏宣。而公令明等迫切宮闕。要遮創戮近臣於大道人衆中。欲以隔塞聰明。杜絕論議之端。桀黠無所畏忌。萬衆譁譁。流聞四方。不與凡民忿怒爭鬪者同。臣聞敬近

臣爲近主也。禮下公門。式路馬。君畜產。且猶敬之。  
春秋之義。意惡功遂。不免於誅。上侵之源。不可長  
也。况首爲惡。明手傷功。意俱惡。皆大不敬。明當以  
重論。及况皆棄市。廷尉直以爲律。曰鬪以律傷人。  
完爲城旦。其賊加罪一等。與謀者同罪。詔書無以  
詆欺成罪。傳曰。遇人不以義。而見疚者。與痛人之  
罪均。惡不直也。咸厚善修。而數稱宣惡。流聞不誼。  
不可謂直。况以故傷咸。計謀已定。後聞置司隸。因  
前謀而趣謀。非以恐咸爲司隸。故造謀也。本爭私。

變雖於掖門外傷咸道中與凡民爭鬪無異殺人者死傷人者刑古今之通道三代所不易也孔子曰必也正名名不正則至于刑罰不中刑罰不中而民無所錯手足今以况爲首惡明手傷爲大不敬公私無差春秋首義原心定罪原况以父見謗發忿怒無它大惡加詆輯小過成大辟陷死刑違明詔恐非法意不可施行聖王不以怒增刑明當以賊傷人不直况與謀者皆爵滅完爲城旦上以問公卿議臣丞相孔光大司空師丹以中丞議是

自將軍以下。至博士議郎。皆是廷尉。況竟減罪一等。徙敦煌。宣坐免爲庶人。卒于家。按此獄當以中尉不推究成毀宣之由而直爲兇申謗父之忿卒使遮斫公行于宮闕戮傷施及于近臣開上侵之原犯投鼠之忌此而可容孰不可容是故兇之滅死在廷尉固爲失議在漢廷亦爲失刑至若申咸之以直道被賊尤當嘉其忠而憫其禍薛修之爲後母竟服亦當褒其孝而增其秩可也

### 虞詡駁大逆

東漢虞翊爲尚書右僕射。先是寧陽主簿詣闕訴其令之枉。六歲不省。主簿乃上書曰。臣爲陛下子。陛下爲臣父。臣章百上。終不見省。臣豈可北詣單



仁信類編卷之二  
于以告怨乎帝大怒持章示尚書尚書遂劾以大  
逾翊駁議曰主簿所訟乃君父之怨百上不達是  
有司之過愚蠢之人不足多誅帝納其言答之而  
已

### 劉愷議坐贓

東漢劉愷拜太尉安帝初清河相叔孫光坐贓抵  
罪遂增錮二世釁及其子孫是時居延都尉范邠  
復犯贓罪詔下三公廷尉議司徒楊震司空陳褒  
廷尉張皓議依光比愷獨以爲春秋之議善善及

子孫惡惡止其身。所以進人於善也。尚書曰：上刑挾輕下刑挾重。如令使賊吏禁錮子孫以輕從重。懼及善人。非先王詳刑之意也。有詔尚書議是。

### 張敏駁輕侮

東漢建初中有人侮辱人父者。而其子殺之。肅宗貲其死刑而降宥之。自後因以爲比。是時遂定其議。以爲輕侮法。尚書張敏駁議曰：夫輕侮之法。先帝一切之恩。不有成科。班之律令也。夫生死之決。宜從上下。猶天之四時。有生有殺。若開相容著爲。

定法者則是故設姦萌生長罪隙。孔子曰：民可使由之，不可使知之。春秋之義，子不報仇，非子也。而法令不爲之減者，以相殺之路不可開故也。今託義者得減，妄殺者有差，使執憲之吏得設巧詐，非所以導在醜不爭之義。又輕侮之比，寢以繁滋。至有四五百科，轉相顧望，彌復增甚，難以垂之萬載。故高帝去煩苛之法，爲三章之約。臣聞師言：救文莫如質。建初詔書有改于古者，可下三公廷尉，蠲除其敝，議寢不省。疏再上和帝從之。

應劭駁代死

東漢安帝時河間人尹次潁川人史玉皆坐殺人當死次兄初及玉母軍並詣官曹乞代其命因縊而物故尚書陳忠以罪疑從輕議活次玉孝廉應劭追駁議曰殺人者死傷人者刑此百王之定制有法之成科高祖入關雖尚約法然殺人者死亦無寬降夫時化則刑輕時亂則刑重書曰刑罰時輕時重此之謂也今次玉公以清時釋其私憾阻兵安忍僵屍道路朝恩在寬幸至冬獄而初軍愚

狷。妾自投斃。昔召忽親死子糾之難。而孔子曰。經  
於溝瀆。人莫之知。鼂氏之父。非錯刻峻。遂能自隕。  
其命。班固亦云。不如趙母指括以全其宗。傳曰。僕  
妾感慨而致死者。非能義勇。顧無慮耳。夫刑罰威  
獄。以類天之震耀殺僇也。溫慈和惠。以倣天之生  
殖長育也。是故春一草枯。則爲災。秋一木華。則爲  
異。今殺無罪之初軍。而活當死之次玉。其爲枯華。  
不亦然乎。陳忠不詳制刑之本。而信一時之仁。遂  
廣引八議求生之端。夫親故賢能。功貴勤賓。豈有

次玉當罪之科哉。若乃小大以情。原心定情。此爲求生。非謂代死可以生也。敗法亂政。悔其可追。

郭躬駁專擅

東漢郭躬爲郡吏。辟公府。永平中。奉車都尉竇固出擊匈奴。騎都尉秦彭爲副。彭在別屯。而輒以法斬人。固奏彭專擅。請誅之。顯宗乃引公卿朝臣。平其罪科。躬以明法律。召入議。議者皆然。固奏。躬獨曰。於法。彭得斬。帝曰。軍征校尉一統于督。彭旣無斧鉞。可得專殺人乎。躬對曰。一統于督者。謂在部

仁翁類稿卷之十一  
曲也。今彭專軍別將。有異於此。軍事呼吸不容先  
關督帥。且漢制。棨戟卽爲斧鉞。於法不合罪。帝從  
躬議。

### 盧毓引經典

盧毓東漢末爲冀州主簿。時天下草創。多逋逃。故  
重士亡法。罪及妻子。亡士妻白等始適夫家數日。  
未與夫相見。大理奏棄市。毓駁之曰。夫女子之情。  
以接見而恩生。成婦而義重。故詩云。未見君子。我  
心傷悲。亦旣見止。我心則降。又禮未廟見之婦而

死歸葬女氏之黨。以未成婦也。今白等生有未見之悲。死有非婦之痛。而更欲律之大辟。則若同牢合卺之後。罪何所加。且記曰。附從輕。言附人之罪。以輕者爲比也。又書云。與其殺不辜。寧失不經。恐過重也。苟以白等皆受禮聘。已入門庭。刑之爲可殺之爲重。魏王操曰。毓執之是也。又引經典有意。使孤嘆息。

程咸議出女

司馬昭輔政。是時魏法犯大逆者誅及已出之女。



母丘儉之誅其子甸妻荀氏應坐死其族兄顗與  
昭通姻表魏帝以正其命詔聽離婚荀氏所生女  
芝爲潁川太守劉子元妻亦坐死以懷妊繫獄荀  
氏詞詣司隸校尉何曾求沒爲官婢以贖芝命曾  
哀之使主簿程咸上議曰女人有三從之議無自  
專之道出適他族還喪父母降其服紀所以明外  
成之節異在室之恩而父母有罪追刑已出夫黨  
見誅又有隨姓之戮一人之身內外受辟今女旣  
嫁則爲異姓之妻如或產育則爲他族之母此爲

誅元惡之所忽。戮無辜之所重。於防則不若懲。姦亂之原。于情則傷孝子之心。男不得罪於他族。而女獨嬰戮於二門。非所以哀矜女弱。蠲明法制之本也。臣以爲在室之女。從父母之誅。旣醮之婦。從夫家之罰。宜改舊科。以爲末制。有詔從之。

斬克可少謝

魏主髦討司馬昭中護軍賈克。與戰南關下。太子舍人成濟抽戈弑髦。昭會羣臣謀其故。太常陳泰不至。使其舅荀顗召之。泰垂涕而入。昭待之曲室。

謂曰玄伯卿何以處我對曰惟斬賈克可以少謝  
天下昭曰更思其次泰曰泰言惟有進於此者不  
知其他昭乃不更言按昭問其次意在濟也泰欲  
進此直指昭耳故昭不敢復言

### 羊亮議無盜

晉羊亮爲太傅楊駿叅軍時京兆多盜駿欲更重  
其法盜百錢加大辟請官屬會議亮曰昔楚江乙  
母失布以爲盜由令尹公若欲無盜宜自近何重  
法爲

嵇紹駁復爵

晉嵇紹爲侍中。時司空張華爲趙王倫所誅。惠帝復作議者追理其事。欲復其爵。紹駁之曰。臣之事君。當除煩去惑。華歷位內外。雖粗有善事。然闔棺之責。著於遠近。兆禍始亂。華實爲之。故鄭討幽公之亂。斲子家之棺。魯戮隱罪。終篇貶輦。未忍重戮。事已弘矣。不宜復其爵位。謂其無罪。按華被收時對使者曰。式乾之議。諫事具存。可覆按也。收者曰。諫而不從。何不去位。華無以對。觀華之無以對。則知爵位之不當復矣。

# 仲堪議詐服

晉殷仲堪爲荊州刺史。桂陽人黃欽生父沒已久。詐服衰麻。言迎父喪。府曹先依律詐取父母卒棄市。仲堪乃曰。律詐取父母卒。依毆詈法棄市。原此之旨。當以二親生存。而橫言死沒。情事悖逆。忍所不當。故同之毆詈之科。正以大辟之刑。今欽生父實終沒。墓在舊邦。積年久遠。方詐服迎喪。以此爲大妄耳。比之於父存言亡。相殊遠矣。遂活之。

# 劉毅論買裘

晉劉毅爲諫議大夫。趙王倫時爲瑯琊郡王。坐使散騎將劉緝買工所得盜御裘。廷尉杜友正緝棄市。倫當與緝同罪。有司奏倫爵重屬親。不可坐。毅駁曰。王法賞罰不阿貴賤。然後可以齊祖制而明典刑也。倫知裘非常。蔽不語吏。與緝同罪。當以親貴議減。不得闕而不論。宜自於一時法中如友所正。帝是毅駁。然以倫親親。故下詔原之。

### 劉隗論暮宴

晉劉隗爲從事中郎。遷丞相司直。廬江太守梁龕

何休集卷之二十一  
明日當除父服。今日請客奏伎。丞相長史周顗等三十餘人同會。隗奏議曰：夫嫡妻長子皆杖居廬。故周景王有三年之喪。旣除而晏。春秋猶譏。况龕匹夫。暮宴朝祥。慢服之愆。宜肅喪紀之禮。請免龕官。削侯爵。顗等知龕有喪。古會非禮。宜各奪俸一月。以肅其違。從之。

### 范堅駁贖父

東晉范堅爲尚書左丞。成帝時。奏殿中帳施吏邵廣盜官幔二帳。合布三十疋。有同正刑。棄市。廣二

子宗年十三。雲年十一。黃幡撾登聞鼓乞恩。辭求  
自沒爲奚官奴。以贖父命。尚書官朱映議以爲天  
下之人無子者少。一人事行遂成永制。懼死罪之  
刑于此而弛。時議者以廣爲鉗徒。二兒沒入。旣足  
以懲父。使百姓知父子之道。聖朝有垂恩之仁。可  
特聽廣減死罪。爲五歲刑。宗等付奚官爲奴。而不  
爲永制。堅駁之曰。自淳朴澆散。刑辟乃作。刑之所  
以止刑。辟之所以止辟。雖時有赦過宥罪。議獄緩  
死。未有不忍而輕典刑者也。且旣許宗等宥廣死。



傳類編卷之十一  
罪若復有宗比而不聽贖者。豈得不擯絕人倫同  
之禽獸邪。按主者今奏云。唯特聽宗等而不爲永  
制。臣以爲王者動關盛衰。嘖笑之間尚慎所加。今  
之所以宥廣正以宗等人之愛父。誰不如宗。今旣  
許宗等之請。將來訴者何獨匪人。特聽之意未見  
其益。不以爲例。反滋怨讟。此爲施一恩於今而開  
萬怨於後也。

沈亮議同坐

劉宋孝武元嘉中。出鎮歷陽。沈亮行參征虜將軍。

事人有盜發塚者。欲罪所近村人。與符伍遭劫。不  
赴救。同坐。亮議曰。尋發塚之情。事止竊盜。徒以侵  
亡犯死。故同之嚴科。夫穿掘之侶。必銜枚以晦其  
迹。劫掠之黨。必謹呼以滅其事故。兇赫者易應。潛  
密者難知。且山原爲無人之鄉。丘隴非常塗所踐。  
至於防救。不得比之村鄉。督實劾名。理與劫異。則  
符伍之坐。居宜降矣。又法罰之科。雖有同科之限。  
而無遠近之斷。夫家無村甲。當以比近坐之。若不  
域之以界。則數步之內。與千里之外。便應同懼。其

作御製續本卷之十一  
責防人之禁。不可不慎。夫正罪之憲。宜當其律。愚  
謂相去百步內。赴告不救者。一歲刑。自此以外。差  
不及咎。

### 承天議償債

劉宋何承天爲南蠻長史。時有尹嘉者。家貧。母熊  
自以身貼錢爲嘉償責。坐不孝當死。承天議曰。彼  
府宣令。普議尹嘉大辟事。稱法吏葛滕籤母告子  
不孝。欲殺者許之。法云。謂違犯教令。敬恭有虧。父  
母欲殺。皆許之。其所告。惟取信於所求而許之。謹

尋事原心。嘉母辭自求質錢爲子償責。嘉雖虧犯教義而能無請殺之辭。能求所以生之。而今殺之。非隨所求之謂。始以不孝爲劾。終于和賣結刑。倚旁兩端。母子俱罪。滕籤法文爲非其條。嘉所存者大理在難申。但明教爰發矜其愚蔽。夫明德慎罰。文王所以恤下。議獄緩死。中孚所以垂化。言情則母爲子隱。語敬則禮所不及。今捨乞宥之評。依請殺之條。責恭敬之節於饑寒之隸。誠非罰疑從輕。寧失有罪之謂也。愚以謂降嘉之死。以普春澤之

恩赦熊之愆。以明子隱之直。則蒲臺雖陋。可比德於盛明。豚魚微物。不獨遺於今化。事未判。值赦竝免。

承天平誤射

何承天爲撫軍將軍行參軍。常出行。而鄆陵縣吏陳滿射鳥。誤中直帥。雖不傷人。據法棄市。承天議曰。獄貴情斷。疑則從輕。昔有驚漢文帝乘輿馬者。張釋之劾以犯蹕罪。止罰金。何者。明其無心於驚馬也。故不以乘輿之重。加于異制。今滿意在射鳥。



固其宜也。但爲刼之時。叔父已歿。代公道生。竝是從弟大功之親。不合補譴。今若以叔父爲期親。令代公從母補兵。旣垂大功不譴之制。又失婦人三從之道。由於主者守期親之文。不辨男女之異。謂代公等母子竝宜見原。

王弘議同伍

劉宋元嘉中。八座丞郎疏言。同伍犯法。無人士不罪之科。然每至詰謫。輒有請訴。若常垂恩宥。則法廢不行。依事糾責。則物以爲苦。恐宜改爲其制。時

議多不同。議司王弘以爲謂之人士。便無庶人之坐。署爲庶人。輒受人士之罰。不其頗與。謂人士可不受同伍之謫。故罪其奴客。庸何傷邪。無奴客。可令輸贖。有修身閭閻。與羣小實隔。又或無奴僮。爲衆所明者。官長二千石。便親臨列上。依事遣判。

### 王弘議吏儉

劉宋制。主吏儉五疋。常儉四十疋。竝加大辟。議者咸以爲重。王弘以爲小吏無知。臨財易昧。或由疎慢。事蹈重科。宜進主吏儉十疋。常儉五十疋。死四



十疋降以備兵。至於官長以上荷受蒙榮祿冒利五疋。乃以爲私。士人至此何容復加哀矜。且此輩人士可辱不可謫。謂宜奏聞決之聖旨。帝從其議。

### 傅堅駁徙母

劉宋傅堅爲司徒左長史。元嘉七年剡縣人黃初妻趙打其子載妻王死。後遇赦。王有父母及子男稱男稱子名。依法徙趙二千里。堅議曰。禮律之興。蓋本自然。求之情理。非從天墮。非從地出。父子至親。分形同氣。稱之于載。卽載之于趙。雖云三代合之一。

體未有分之者也。稱雖創巨痛深。固無仇祖之義。故古人不以父命辭王父命也。若云稱可殺趙。趙當何以處載。若父子祖孫互相殘戮。懼非先王明罰。臯陶立法之本旨也。向使石厚之子。日磾之孫。砥鋒挺錐。不與二祖同戴天日。則石碯。嵇侯。何得純臣于國。孝義于家矣。舊令云。殺人父母。徙二千里外。不施父子祖孫明矣。趙當避王期功千里外耳。令云。凡流徙者。同籍親近。欲求隨聽之。此又大通情禮以教愛者也。趙既流移。載爲人子。何得無

仁翁類稿 卷之十一  
徙載行而稱不行。豈名教所許。趙雖內愧。終身沈痛歿齒。孫祖之義。自不得絕。事理固然。

### 深之議罵母

劉宋孔深之。大明中爲尚書比部郎。時應城縣張江陵與妻吳共罵母黃。令死。黃忿恨自縊死。已值赦案律。子賊殺毆傷父母梟首。罵詈棄市。謀殺夫之父母亦棄市。會赦免刑補治。江陵罵母。母以自裁。重於傷毆。若同殺科。則疑重用傷毆及詈科。則疑輕。制唯有打母遇赦猶梟首。無詈致死會赦之

科深之議曰。夫題里逾心而仁者不入名。且惡之。況乃人事故毆傷。咒咀法所不原。詈之致盡。則理無可宥。罰有從輕。蓋疑失善求之文旨。非此之謂。江陵雖遇赦恩。故合梟首。婦本以義愛。非天屬。黃之所恨。情不在吳。原死補治。有允正法。詔如深之議。吳可棄市。

### 殺母絕其類

西魏邢蚪爲殿中郎。時鴈門人有害母者。八座奏輟之。而渚其室。宥其二子。蚪駁議云。君親無將。將

而必誅謀逆者戮及期親害親者令不及子既逆甚梟獍禽獸之不若而使禋祀不絕遺育承傳非所以勸忠孝之道存三綱之義若聖教含容不加孥戮使父子罪不相及惡惡止于其身者則宜投之四裔勅所在不聽匹配盤庚言無令易種新邑漢法五月食梟羹皆欲絕其類也奏入從之

### 源賀議斷獄

西魏文成時斷獄多濫源賀上書曰案律謀反之家其子孫雖往他方猶追還就戮所以絕罪人之

類彰大逾之辜。其爲刼賊應誅者。兄弟子姪。在蓬  
道隔關津。皆不坐。竊惟先朝制律之意。以不同謀。  
非絕類之罪。故特垂不死之詔。若年十三以下。家  
人首惡。計所不及。臣愚以爲可原其命。沒入官。

### 宋軌駁設捧

北齊文宣時。清河房超。爲黎陽郡守。有趙道德者。  
使以書屬超。超不發封。捧殺其使。文宣於是令守  
宰各設捧。以誅屬請之使。都官郎中宋軌奏曰。昔  
曹操懸捧。威於亂時。今施之太平。未見其可。若受

使請賊。猶致大戮。身爲枉法。何以加罪。於是罷之。

### 竇瑗議母子

隋竇瑗爲神武丞相府右長史。上表曰。臣伏讀麟趾新制。至三公曹第十六條。母殺其父。子不得告。告者死。三返覆之。未得其門。何者。案律。子孫告父母。祖父母者死。又漢宣帝云。子匿父母。皆勿論。蓋謂祖父母。父母小者。攘羊。甚者殺害之類。恩須相隱。律抑不言。法理如是。足見其直。未必指母殺父止。子不言也。今母殺父。而子不告。便是知母而不

知父。識此野人。義近禽獸。且母之於父。作合移天。既殺已之天。復殺子之天。二天頓毀。豈容頓默。此母之罪。義在不赦。下手之日。母恩卽離。仍以母道不告。鄙臣所以致惑。如或有之。可臨時議罪。何用豫制斯條。用爲訓誡。詔付尚書三公。卽封君議立判云。母殺其父子。復告母。母由告死。便是子殺夫。下未有無母之國。不知此子將欲何之。瑗復難云。案典律。未聞母殺其父。而子有隱母之義。旣不告母。便是與殺父同。天下可有無父之國。此子獨得。



有所之乎。

玄齡議緣坐

故時律。兄弟分居。蔭不相及。而連坐則俱死。同州人房彊。以弟謀反。當從坐。唐太宗因錄囚。爲之動容。曰。反逾有二。興師動衆一也。惡言犯法二也。輕重固異。而均謂之反。連坐皆死。豈定法邪。房玄齡等議曰。禮。孫爲父尸。故祖有蔭。孫令是祖孫重。而兄弟輕。於是令反逾者。祖孫與兄弟緣死。皆配沒。惡言犯法者。兄弟配流而已。

## 仁師駁從輕

唐崔仁師爲給事中。時刑部以盜賊律反逾緣坐。兄弟沒官爲輕。請改從死。奏請八座詳議。右僕射高士廉。吏部尚書侯君集。兵部尚書李勣等議。請從重。民部尚書唐儉。禮部尚書江夏王道宗。工部尚書杜楚容等議。請依舊時議者。以漢魏晉謀反皆夷三族。欲依士廉等議。仁師獨駁。以爲父子天屬。昆季同氣。誅其父子。足累其心。此而不顧。何愛兄弟。旣欲審服。請更審量。竟從仁師駁議。

彥瑋論劉洎

唐樂彥瑋爲給事中。故侍中劉洎之子詣闕上言。洎貞觀末爲褚遂良所譖枉死。稱冤申雪。中書侍郎李義府又左右之。高宗以問近臣。衆希義府之旨。皆言其枉。彥瑋獨進曰。劉洎大臣。舉措須合矩度。人主暫有不豫。豈得卽擬負國。先朝所責未爲不愜。且國君無過舉。若雪洎之罪。豈可謂先帝用刑不當乎。帝然其言。

有功議支黨

唐徐有功遷司刑丞時瑯琊王冲責息錢於貴鄉遣家奴督歛與尉顏餘慶相聞知奴自市弓矢還會冲坐逆誅魏州人告餘慶豫冲謀則天令來俊臣鞠治以及狀聞有司議餘慶更求昌赦法當流侍御史魏元忠謂餘慶爲冲督償通書合謀明甚非曰支黨請殊死籍其家詔可有功曰求昌赦令與虺貞同惡時則天以貞等不附已故改李姓爲虺魁黨已伏誅支黨未發者原之餘慶赦後被言是謂支黨今以支爲首是以生入死赦而復罪不如無赦生而復殺

不如勿生。竊爲朝廷不當爾。后曰：何謂魁首？答曰：魁者大帥。首者原謀。后曰：餘慶安得不爲魁首？答曰：若魁首者，虺貞是已。旣以伏誅，餘慶今方論罪，非支黨何？后意解。乃曰：公更思之。遂免死。有韓紀孝者，受徐敬業僞官。前已物故，推事使顧仲琰籍其家，詔報可有功。追議曰：律謀反者，斬身亡卽無斬法，則不得相緣。所緣之人亡，則所因之罪減。詔從之。

朝隱原乞取

唐李朝隱。開元中。遷大理卿。時武強令裴景仙犯  
乞取贓。積五千匹。事發逃走。上大怒。令集衆殺之。  
朝隱執奏曰。景仙緣是乞贓。犯不至死。且景仙曾  
祖故司空寂。往屬締構。首屬元勳。延載初年中。蒙  
陷非罪。凡有兄弟。皆被誅夷。唯景仙獨存。今見承  
嫡。據贓表當死。坐準犯。猶入清條。十代宥賢。功實  
宜錄。一門絕祀。情或可哀。願寬暴布之刑。俾就投  
荒之役。手詔不許。朝隱又奏曰。生殺之柄。人主自  
專。輕重有條。臣下當守。枉法者。枉法而取十五匹。

便抵死刑。乞取者。因乞爲贓。數千匹。止當流坐。今若乞取論罪。便處斬刑。後有枉法當科。欲加何辟。所以爲國惜法。期守律文。非敢以法隨人。曲矜仙命。射免魏苑。驚馬漢橋。初震皇赫。竟從廷議。豈威不能制。而法貴有常。又景仙曾祖寂。草昧忠節。寔爲元勲。若寂勲都弃。仙罪特加。則叔向之賢。何足稱者。若敖之鬼。不其餒而乃詔。決杖一百。流嶺南惡處。

李峴推首從

唐李峴。吳王恪孫也。初東京平。陳希烈等數百人待罪。議者將悉抵死。帝意欲懲天下。故崔益等附致深文。峴時爲三司。獨曰。法有首有從。情有重有輕。若一切論死。非陛下與天下維新意。且羯萌亂。常誰不凌汙。衣冠奔亡。各顧其主。可盡責邪。陛下之親戚勲舊子若孫。一日皆血鐵砧。尚爲仁恕哉。書稱殲厥渠魁。脅從罔治。况河朔餘孽。刼服官吏。其人尚多。今不開自新之路。而盡誅之。是堅叛者心。使爲賊致死。困獸猶鬪。况數萬人乎。于時器與



仁翁類稿卷之十一  
直方堂  
呂涇皆齷齪文吏。操常議不及大體。尚騰頰固爭。數日乃見聽。衣冠蒙更生。賊亦不能使人歸怨天子。峴力也。

### 元錫引復仇

唐衢州人余常安。父叔二人爲同郡方金所殺。常安八歲。自誓十七乃復仇。大理斷死。刺史元錫奏余氏一家遭橫死者實二。平民蒙顯戮者乃一。孝子引公羊傳。父不受誅。子得復仇之義。時裴均爲宰相。李鄲爲刑部。事竟不行。士人薛伯高遺錫書。

曰。大司寇是俗吏。司刑人柄。乃小生。余氏子宜其死矣。

先後復仇議

唐太宗時。卽墨人王君操。父隋末爲鄉人李君則所殺。亡命去。時君操尚幼。至貞觀初。朝世更易。而君操寡孤。仇家無所憚。詣州自言。君操密挾刃殺之。剔其心肝。噉立盡。趨告刺史曰。父死凶手。歷二十年。不克報。乃今刷憤。願歸死有司。州上狀。帝爲貸死。高宗時。絳州人趙師舉。父爲人所殺。師舉幼。

母改嫁。仇家不疑。師舉長爲人傭。夜讀書。久之。手殺仇人。詣官自陳。帝原之。求徽中同官人周智壽。父爲族人所害。智壽與弟智爽。候諸塗。擊殺之。相率歸有司。爭爲首。有司不能決者三年。或言弟始謀。乃論死。臨刑曰。讐已報。死不恨。智壽自投地。委頓。身無完膚。舐智爽血盡乃已。見者傷之。武后時。下邳人徐元慶。父爽爲縣尉。趙師韞所殺。元慶變姓名爲驛家保。久之。師韞以御史舍亭下。元慶手殺之。自囚詣官。后欲赦死。左拾遺陳子昂議曰。先

王立禮以道人。明刑以齊政。枕戈讐敵。人子義也。誅罪禁亂。王政綱也。然無義不可訓人。亂綱不可明法。聖人修禮治內。飾法防外。使守法者不以禮廢刑。居禮者不以法傷義。然後暴亂銷。廉恥厲。天下所以直道而行也。元慶報死讐。束身歸罪。雖古烈士何以嘉。然殺人者死。畫一之制也。法不可二。元慶宜伏辜。傳曰。父仇不同天。勸人之教也。教之不苟。元慶宜赦。臣聞刑所以生。遏亂也。仁所以利。崇德也。今執父之仇。非亂也。行子之道。仁也。仁而

無利與同亂誅。是曰能刑。未可以訓。然則邪由正  
生。治必亂作。故禮防不勝。先王以制刑也。今義元  
慶之節。則廢刑也。跡元慶所以義動天下。以其忘  
生而趨其德也。若釋罪以利其生。是奪其德。釋其  
義。非所謂殺身成仁。舍死忘生之節。臣謂宜正國  
之典。寘之以刑。然後旌閭墓可也。時違其言。後禮  
部員外郎柳宗元駁曰。禮之大本以防亂也。若曰  
無爲賊虐。凡爲子者殺無赦。刑之大本亦以防亂  
也。若曰無爲賊虐。凡爲治者殺無赦。其本則合。其

用則一旌與誅不得並也。誅其可旌。茲謂濫。黷刑甚矣。旌其可誅。茲謂僭。壞禮甚矣。若師韞獨以私怨奮吏。氣虐非辜。州牧不知罪。刑官不知問。上下蒙冒。籲號不聞。而元慶能處心積慮。以衝讐人之胸。介然自克。卽死無憾。是守禮而行義也。執事者宜有慚色。將謝之不暇。而又何誅焉。其或不免於罪。師韞之誅。不愆於法。是非死於吏也。是死於法也。法其可讐乎。讐天子之法。而戕奉法之吏。是悖驚而凌上也。執而誅之。所以正邦典。而又何旌焉。

禮之所謂讐者。冤抑沈痛而號無告也。非謂抵罪觸法。陷於大戮。而曰彼殺我。乃殺之。不義曲直。暴寡脅弱而已。春秋傳曰。父不受誅。子復仇可也。父受誅。子復仇。此推刃之道。復仇不除害。此若取此以斷兩下相殺。則合於禮矣。且夫不忘仇。孝也。不愛死。義也。元慶能不越於禮。服孝死義。是必達於禮而聞道者也。夫達理聞道之人。豈其以王法爲敵讐者哉。議者反以爲戮。黷刑壞禮。其不可以爲典明矣。請下臣議。附于令。有斷斯獄。不宜以前議。

從事玄宗時張琇河東解人父審素爲雋州都督有陳篡仁者誣其冒戰級私庸兵帝疑之詔監察御史楊汪卽按篡仁復告審素與總管董堂禮謀反於是汪收審素繫雅州獄馳至徽州按反狀堂禮不勝忿殺篡仁以兵七伯圍汪脅使露章雪審素罪旣而吏共斬堂禮汪得出遂當審素實反斬之沒其家琇與兄瑄尚幼徙嶺南久之逃還汪更名萬頃瑄時年十三琇少二歲夜徂萬頃於魏王池瑄斫其馬萬頃驚不及鬪爲琇所殺條所以殺



萬頃繫於斧。奔江南。將殺。搆父罪者。然後詰有司。道汜水。吏捕以聞。中書令張九齡等皆稱其孝烈。宜貸死。侍郎裴耀卿等陳不可。帝喟然謂九齡曰。孝者義不顧命。殺之可成其志。赦之則虧律。凡爲子。孰不欲孝。轉相仇殺。遂無已時。然道路誼議。故須告示。乃下勅曰。張瑄等兄弟同殺。推問欵承。律有正條。俱各至死。近聞士庶頗有誼詞。矜其爲父復仇。或言本罪冤濫。但國家設法。事在經久。蓋以濟人。期于止殺。各申爲子之志。誰非徇孝之夫。展

轉相繼相殺何限。咎繇作士。法在必行。曾參殺人。亦不可恕。不能加以刑。僂肆諸市朝。宜付河南府。告示決殺。臨刑賜食。理不能進。琇色自如。曰。下見先人。復何憾。人莫不閔之。爲誅揭於道。歛錢爲葬。北邙尚恐讐人發之。作疑冢。使不知其處。憲宗時。衢州人余常安。事見前。又富平人梁悅。父爲秦果所殺。悅殺讐。誦縣請罪。詔曰。在禮。父仇不同天。而法殺人必死。禮法王教大端也。二說異焉。下尚書省議。職方員外郎韓愈曰。子復父仇。見於春秋。禮。

記周官子若吏不勝數未有非而罪者最宜詳于律而律無條非闕文也蓋以爲不許復仇則傷孝子之心許復仇則人將倚法顓殺無所禁止夫律雖本于聖人然執而行之者有司也經之所明者制有司者也丁寧其義於經而深沒其文於律者將使法吏一斷于法而經術之士得引經以議也周官曰凡殺人而義者令勿讐讐之則死義者宜也明殺人而不得其宜者子得復仇也此百姓之相讐者也公羊子曰父不受誅子復仇可也不受

誅者罪不當誅也。誅者上施下之辭。非百姓相殺也。周官曰：凡殺仇讐者，書於士，殺之無罪。言將復仇，必先言于官，則無罪也。復仇之名雖同，而其事各異。或百姓相讐，如周官所稱，可議於今者，或爲官吏所誅，不可行於今者。周官所稱，將復仇，先告於士。若孤穉羸弱，抱微志而伺敵人之便，恐不敢自言，未可以爲斷於今也。然則殺之與赦，不可一宜定其制曰：有復父仇者，事發具其事，下尚書省集議以聞，酌處之，則經無失指矣。有詔以悅申冤。

請罪請公門。流循州。愚按諸人復仇。如王君操。趙師舉。周智壽。余常安。梁悅。其父皆爲仇人所害。如韓昌黎所謂百姓相殺者。其讐原有殺人之罪。諸人手刃父仇。以命抵命。律之以擅殺之條。雖不能無罪。揆之不共戴之義。其烈誠足嘉宥之宜也。罪之過也。殺之又過也。若徐元慶。張瑄。二父則皆被法。如昌黎所謂爲官吏所誅者。元慶之事。宗元之駁當矣。張審素反謀。雖爲陳篡仁所誣。然同黨董堂。禮刼。圍命使脅使雪罪。是真反矣。楊枉之勘。雖

不能無虧枉。然審素之死。亦不得爲無罪。瑄琇兄弟。以一介亡命。輒戕命使。使悉縱而不誅。則是國法可讐。專殺莫討。雖云孝心可惻。終於資父有虧。帝之不貸。亦未爲過。惜其申諭。止以相殺爲言。未明受誅之義。猶未足以塞道路之誼議耳。雖然。兄弟共犯罪。宜免科貸。一以全孝。誅一以明法。足矣。不少憫而並法焉。此當時之所以共傷也。

### 裴潏議威力

唐裴潏。遷刑部郎中。有前率府倉曹參軍武元衡。

者杖殺百姓。栢公成母。法官以公成母死在辜外。元衡父任軍使。使以父蔭徵銅。公成私受元衡資。貨母死。不聞公府法。寺以經免罪。潸議曰。典刑者公柄也。在官者得施於部屬之內。若非在官。又非公屬。雖有私罪。必告于官。官爲之理。以明不得擅行於齊民也。且元衡身非在官。公成母非公屬。而擅憑威力。橫施殘虐。豈合拘於常典。栢公成取貨於讐利母之死。悖逆天性。犯則必誅。奏下。元衡杖六十配流。公成以法論死。公論稱之。

樂天甲乙判

唐白樂天有甲乙判。讀之使人不厭。甲去妻後妻  
犯罪。用子蔭贖罪。甲不許。判云。不安爾室。盡孝猶  
慰母心。薄送我畿。贖罪寧辭子蔭。縱臨下之有恕。  
曷陟屺之無情。辛夫遇盜而死。求殺盜者而爲  
之妻。或責其失節不伏。判云。夫仇不報。未足爲非。  
婦道有虧。誠宜自恥。詩著靡他之誓。百代可知。禮  
垂不嫁之文。一言以蔽。丙妻有喪。丙于妻側奏  
樂。責之不伏。判云。儼衰麻之在躬。是吾憂也。調絲



竹以盈耳于汝安乎。甲夜行所由執之。辭云有公事欲早趨朝。所由以犯禁不聽。判云非巫馬爲政焉。用出以戴星。同宣子入朝。胡不聽而假寐。乙貴達有故人至。坐之堂下。進以僕妾之食。曰故辱而激之。判云安實敗名。重耳竟慚。于曰犯感而成事。張儀終謝於蘇秦。丙娶妻無子。父母將出之。辭曰歸無所從。判云雖配無生育。誠合比於斷絃而歸靡適從。度可同於束縕。乙爲三品。見本州刺史不拜。或非之。稱品同判云。或商周不敵。敢

不盡禮事君。今晉鄭同朝。安得降階卑我。丙居喪。年老毀疾。或非其過禮。曰哀情所鍾。判曰。況血氣之既衰。老夫耄矣。縱哀情之罔極。吾子忍之。

### 希崇斷義嫡

石晉張希崇。鎮汾州。有民與郭氏爲義子。因悖戾。不受訓教。遣之。郭氏夫婦相次俱死。義子全未來。顧時郭氏之親子已長成矣。有郭氏諸親與義子相約云。是親子欲分其財。助而訟之。前後更數官。不能理。遂成疑獄。希崇覽其訴狀。斷云。父在已離。

母死不至。雖假稱義子。辜二十年撫養之恩。儻曰。親兒犯三千條悖逆之罪。大爲傷害名教。安敢理認。因園其生涯。並付親子。所訟人與朋黨者。委法官以律定刑。聞者服其明斷。

### 行本駁違律

劉行本。仕周。遷黃門侍郎。時雍州別駕元肇言於上曰。有一州吏受人餽錢二百文。依律合杖一百。然臣下車之始。與吏爲約。此更故違。請加徒一年。行本駁議曰。律令之行。上發明詔。與民約束。今肇

乃敢重其敎命。輕忽憲章。欲申已言之必行。忘朝廷之大信。虧法損威。非人臣之禮。上嘉之。賜絹伯匹。

### 徐鉉議歸產

宋端拱初。廣定軍民安。崇緒隸禁民。訴繼母馮與父知逸離。今奪貲產。與已子大理當。崇緒訟母罪死。太宗疑之。判大理張似固執前斷。遂下臺省。雜議徐鉉議曰。今第明其母馮嘗離。卽須歸宗。否則崇緒準法處治。今詳案內。不曾離異。其證有四。况

不孝之刑教之大者宜依刑部大理寺斷右僕射  
李昉四十三人請曰法寺定斷爲不當若以五母  
皆同卽以阿滿雖賤乃崇緒親母崇緒但以田業  
爲馮強占親母衣食不給所以論訴若從法寺斷  
死則知逸何辜繼嗣阿滿何地托身臣等以爲田  
產竝歸崇緒馮合與滿同居供侍終身如是則子  
有父業可守終身不至乏養所犯竝準赦原鉉似  
各奪俸一月

呂端議宥母

宋呂正惠公端拜戶部侍郎同平章事。初李繼遷擾西邊。保安軍奏獲其母。至是太宗欲誅之。以寇準爲樞密副使。獨召與謀。準退過相幕。端疑謀大事。邀謂準曰。上戒君勿言於端乎。準曰否。端曰。邊鄙常事。端不必與知。若軍國大計。端備位宰相。不可不知也。準遂告其故。端曰。何以處之。準曰。欲斬於保安軍北門外。以戒凶逆。端曰。必若此。非計之得也。願少緩之。端將覆奏。入曰。昔頃羽得太公欲烹之。高祖曰。願分我一杯羹。夫舉大事。不顧其親。

况繼遷悖逆之人乎。陛下今日殺之。明日繼遷可擒乎。若其不然。徒結怨讐。愈堅其叛心。爾。太宗曰。然則何如。端曰。以臣之愚。宜於延州善養視之。以招來繼遷。雖不能卽降。終可以繫其心。而母死生之命在我矣。太宗撫髀稱善曰。微卿。幾誤我事。卽用其策。

### 王曾論違制

宋王文正公會知審刑院。舊違制無故失。率坐徒二年。曾請須親被告乃坐。旣而有犯者。曾乃以失

論帝曰。如卿言。是無復有違制者。曾曰。天下至廣。豈人人盡曉制書。如陛下言。亦無復有失者。帝悟。卒從曾議。

### 杜紘議養婦

宋杜紘爲大理評斷官。每議獄。必傳經誼。民間有女。幼許嫁。未行。而養於壻氏。壻氏殺以誣人。吏當如昏法。紘曰。禮。婦三月而廟見。未廟見而死。則歸葬於家。示未成婦也。律。定婚而夫犯論。凡人養婦。雖非禮律。然未成婦。則一也。議乃定。



大猷議盜法

宋汪大猷爲刑部侍郎尚書周執羔韓元吉樞密  
劉珙以強盜率不處死無所懲艾右司林栗謂太  
祖朝強盜滿三貫死無首從不問殺傷景祐增五  
貫因從寬今設六項法非手刃人例奏裁黥配何  
所懲艾請從舊法贓滿三貫者斬大猷曰此吾職  
也遂具奏曰強盜安可恕用舊法而痛懲之固可  
也天聖以來益用中典寢失禁姦之意今所議六  
項法犯者以法行之非此而但取財唯再犯者死

可謂寬嚴適中。若皆置之死地。未必能禁其爲盜。盜知必死。將甘心於事主矣。聖稍開其生路。乃奏用六項法。則死者十七人。用見行法。則死者十四人。用舊法。則死者七十人。俱死。遂從大猷議。

程廻議訟母

宋程廻字可大。寧陵人。登隆興元年進士。知進賢縣。省符下。知平江府王佐決陳長年輒私賣田。其從子愬有司。十有八年。母魚氏年七十坐獄。廷辨按法追正。令候母死。服闋日理爲已分。令天下郡

邑視此爲法。廻議曰：天下之人孰無母慈？子若孫宜定省溫清，不宜有私財也。在律：別籍者有禁，異財者有禁。嘗報牒之初，縣令杖而遣之，使聽令於其母可矣。何稽滯徧愬有司，而達於登聞院乎？春秋穀梁傳註曰：臣無訟君之道，爲衛侯剽與元咺發論也。夫諸侯之於命大夫，猶若此。子孫之於母，乃使坐獄以對吏，愛其親者聞之，不覺泣涕之橫集也。按令文分財產，謂祖父母、父母服闋已前所有者。然在母在子孫，不得有私財，借使其母一朝

盡費其子孫亦不得違教令也。既使歸於其母。其  
日前所費。乃卑幼輒用尊長物。法須五年尊長告。  
乃爲理。何至豫期母死。又開他日爭訟之端也。安  
知不令之子孫。不死於母之前也。守令者。民之師  
帥。政教之所由出。誠宜正守令。不職之愆。與子孫  
不孝之罪。以敬天下之爲人母者。

### 杜曾議殺傷

宋杜曾爲吏。號知法。嘗言國朝因唐大中制。故殺  
人雖已傷未死。已死更生。皆論如已殺。夫殺人者。

死傷人者刑先王不易之典律雖謀殺已傷則絞蓋甚其處心積慮陰致賊害耳至於過殺初無殺意須其已死乃有殺名苟無殺名而用殺法則與謀殺孰辨自大中之制行不知殺幾何人矣請格勿用又言近世赦令殺人已傷未死者皆得原減非律意請傷者從律保辜法死限內者論如已殺勿赦皆著爲令

妾母嫡子議

宋王梅溪集載契勘阿何訟陳友直不孝事陳友

直狀稱阿何係其父盛之妾。其事已具案牘中。阿何與陳盛以不正合。係妾分明。然在禮法中。有嫡母。庶母。所生母。乳母。妾母。阿何雖非陳盛之妻。然在陳盛之家。已兩有所出。其陳盛當溺愛之時。亦曾以妻禮遇之。某按春秋之法。其父有以妾爲妻者。先賢論之曰。以妾爲妻之罪。其父當尸之。然父以爲妻。其子不得不以爲母。又按禮記內則。父母有婢子。雖父母沒。沒身敬之不衰。父母所愛。雖父母沒。不衰。今阿何雖爲陳盛之妾。其陳友直當以

妾母待之有敬而不衰之義。又按春秋婦人有三從。在家制於父。既嫁制於夫。夫死從長子。婦人不專行。必有從也。以嫡母之尊。猶有制於長子之義。今阿何係陳友直妾母。其家事不得自專。出入當有所制。今欲乞台旨。押阿何歸陳氏之家。守孝俟其服滿。如欲改嫁。則從其便。其所生子。當育於陳氏。俟其長成。依公分析。陳友直當以妾母之禮敬待阿何。不得故有凌辱。其家事當由陳友直掌管。阿何不得自專。庶于經于律。皆無違礙。

梅溪王公  
十朋號

## 分產斷情議

梅溪集載。按梁綵有子八人。內將一子與弟縑爲後。是爲梁謙綵死之後。七子均分。已及十有七年。今據梁謙狀稱。其所養父縑旣死。其所生父綵尚存之時。所養母尹氏曾遣歸宗。合作八分析產。其兄孝廉等供稱。謙不曾於父母在日歸宗。謙已受所養之家物產。不當分所生兄弟之財。今梁綵與尹氏皆已身死。謙歸宗與不曾歸宗。無所憑據。按禮經。爲人後者爲之子。又按律。諸養子所養父母



無子而舍去者徒三年。若自生者及本生無子者聽。又按紹興令諸爲人後而還本生者聽。注謂自欲還。或所養父母遣還者。令許自欲還。蓋謂本生無子。或所養之家已有子也。許所養父母遣還者。義亦如之。今梁綽旣無別子。况綵所出甚衆。謙義爲繼絕。不當歸宗。尹氏旣無所生。亦不遣謙還。綵以絕夫後。謙不當歸宗。則亦不合受所生父母之產。向來提刑司僉廳所定于律已當。然律設大法。禮順人情。謙繼叔父之後。固不當歸家。至若分產。

則斷之以情可也。梁縵死時。謙年尚幼。尹氏典賣其夫物產。從而改嫁。破縵之家。非謙之罪。今謙所生兄弟皆富。所養之家已貧。謙既失所無歸。兄弟自當憐恤。又按令。諸分財產。而衆議願多與同分之人者。聽。此蓋聖人緣情制法。以開遜義之門。今謙與孝廉等。本係同父之親。而有貧富不等之患。雖謙出繼叔之後。不預同分。孝廉等念父恩義。當願與分。今欲乞送縣。告示孝廉等七人。將原分到產業。每人若干。比竝謙見管所養之家產業若干。

七人中各出產業。湊謙見管產業如七人原分之數。均退與謙。其七人浮財。恐係分後增置。卽不許分退。孝廉係是長兄。身仍鬻爵。合倡率諸弟與之。令濟同氣之親。謙仍舊繼所養之後。不得歸宗。以絕繚祀。庶令梁氏之門。稍知孝弟之義。少息爭競之風。

### 杜鎬決毀像

宋杜鎬兄爲法官。嘗有子毀父畫像。爲旁親所訟。疑其法不能決。鎬曰。僧道毀天尊佛像可比也。兄

大奇之。

楊張議殺讐

宋王宣子之母既葬。盜發其塚。剖其棺。取其衣物。事聞於官。獲盜曰嵇四德者。付於獄。時紹興守嚴勘斷罪免死。坐流。宣子之弟公襄怨憤不已。四德出外。公襄攜刀密斫其頭以斃之。郡具以聞。宣子時爲吏部侍郎。乞納出身。詔命以贖弟罪。朝廷下給舍評議。時楊椿爲給事中。張安國在西掖。議以爲父母之讐。得賊而輒殺之。義也。莫之敢殺者。謂

其有法也。獄成而吏出之。使賊出入閭里。與齊民齒。爲之子者。安得自比於人哉。公襄之殺賊。協於義而宜於法也。且此賊掘墓至十數。嘗敗而死。公襄之殺之也。豈獨直王氏之冤哉。是則公襄殺掘塚法應死之人。無罪。佐納官贖弟之請。不當許。故縱大刑之人。宜加罪。於是公襄止降一資。而紹興守臣以下。竝坐失出之罪。

### 王約斷應後

元王約爲禮部尚書。柴氏初無子。命張氏子後。旣

得已子子張出爲僧。柴之子又歿。僧乃訟家產。詔約詰之。約問曰。汝出家。旣分承汝師衣鉢。又何爲得柴氏業乎。僧不能答。遂歸柴氏之應後者。

### 瞻思按同謀

元瞻思至元中。拜陝西行臺監察御史。嘗與五府官決獄。咸寧有婦宋娥者。與鄰人通。鄰人謂娥曰。我將殺而夫。娥曰。張子文行。且殺之。明日夫果死。跡盜數日。娥始以張子文告其姑。五府官以爲非共殺。且旣經赦宥。宜釋之。瞻思曰。張子文以爲娥

固許之矣。且娥夫死及旬日。乃始言之。是娥與張同謀。度不能終隱。故發之也。豈赦可釋哉。樞密判官曰。平反活人。陰德也。御史勿執常法。瞻思曰。是謂故出人罪。非平反也。且公欲種陰德於生者。奈死者何。乃獨上議刑部。卒正娥罪。

### 成遵議匿奸

元成遵。至正中。遷中書右司郎中。時有令輸粟補官。有匿其姦罪。而入粟得七品雜流者。爲怨家所告。有司議輸粟例。無有過不與之文。遵曰。賣官鬻

爵已非盛典。况又賣官與姦淫之人乎。將何以爲治。必奪其勅。還其粟。著爲令。乃可。省臣從之。

### 刑曹駁坐妻

國朝壽州有人殺妻之父母兄弟數口。州司以爲不道。緣坐妻子。刑曹駁曰。毆妻之父母。卽是義絕。况無謀殺。不當復坐其妻。

### 劉達駁不敬

洪武十五年。上海知縣王英。以選力士不稱旨。刑官以欺誑不敬論之。給事中劉達駁。以爲貢舉非



人律有定條。選力士不稱而坐以不敬。大重不當律意。上是其言。命法司自今論決。務從平恕。毋或深文。於是英得從輕論。

大理駁強姦

正統十一年。時民有姦義男之婦未成者。法司擬強姦總麻以上親斬。大理寺卿俞士悅駁奏。義男于義與禮俱無服。于例義男女十五歲過房。不蒙恩養。准顧工人科斷。今本男十五歲。過房年已長大。若告不孝。當依顧工人論。况姦未成乎。上詔。

本犯與義男既恩情已疎。又強姦未成。決杖一百。口外充軍。著爲令。

逼死節婦議

嘉靖八年。湖廣某縣民林寬。以鄰人周福昌弟福受妻江新寡有姿色。欲娶爲妾。江誓死不從。寬強使人納徵焉。福昌受之。江遽易新衣。走夫塋前哭拜投河死。事發。巡按御史張祿擬寬比依因姦威逼人。從重治罪。下刑部看詳。刑部謂林寬謀娶江氏未成。本非因姦。况江氏自誓守節。今反以因姦

致死爲名。亦非昭別遠嫌。以慰幽魂之誼。前律難以比擬。但林寬強納聘儀。逼死節婦。事關風化。比與尋常威逼人致死不同。若使照常發落。委的情重律輕。合將林寬止照常擬。追完埋葬銀兩。定發邊衛充軍。詔從之。

### 李公議投揭

萬曆十五年五月內。有順天府舉人吳鳴鳳。先於十四年十一月內。遣僕李應登。送銀還鄉官徐郎中。應登拐銀逸去。鳴鳳聞之。南城張御史。行城緝

捕未獲。至十二月內。宣南坊菜市口井內。漂出死  
屍一軀。該城插牌召認。應登母劉初稱不是。越日。  
有教以妄認誣賴者。遂稱孤子李應登被鳴鳳弟  
吳四撻死。棄屍井中。亦訴張御史。批城查審。鳴鳳  
復以前情赴愬刑部。行西南兩城兵馬相驗。審鄰  
姜三等。各稱應登身軀長短胖瘦。及魚口瘡疤。不  
同時已。歲年二月矣。司官急於了事。偏信劉氏單  
詞。逮鳴鳳家人龐祿。與弟吳四。拷問誣服。鳴鳳不  
忍其弟受誣。募人有能致應登者。予十金。至五月

內果於禁處獲應登送部應登既獲鳴鳳憤部官  
之嚴訊迫招也刊刻揭帖遍行投遞部科惡其誣  
害叅行三法司同刑科會鞫左都御史吳時來欲  
坐鳴鳳以誣稱夾人脚骨將落比誣告折人一肢  
反坐加等徒罪問革大理少卿李尚思以爲法所  
惡於私揭者爲其挾有讐怨或妬嫉才能誣人生  
平過惡暗行帖揭中傷奸險可恨今鳴鳳當逃犯  
之未獲值弟僕之刑迫殊不勝其冤憤乃逃犯一  
得遂悻悻然遍鳴其苦此狂夫淺狹之見不應得

爲而爲之者也。與所謂挾私忌害顛倒是非者情  
自不同。且當劉氏初認屍之時。如法拷訊。亦不爲  
過。及該城相驗身之長短鬚之有無。年之老少。旣  
已可疑。乃猶失於詳慎。嚴急拷訊。以致吳四妄認  
打死。則其勢誠急。而其情誠可悲矣。此鳴鳳之所  
以不得其平。則鳴也。鳴鳳先以刁婦誣告。業受屈  
抑。今幸事已辨白。復欲褫其衣冠。是其殺人之寃  
甫白。而今又將含寃也。破三尺之法。以順刑官之  
怒。豈聖明之世所宜有哉。時來尋亦改奏。鳴鳳旣

以僕逃而受累。又以僕獲而被斥。不惟鳴鳳益不能堪。而主僕之分未辨。亦無以服其心。乃止擬應得罪名。免其問革。劉氏等聽刑部具論如律。詔從之。

仁獄類編卷之十一終